

# VIHREÄ AATE — SULITARITEETTIA KÄYTÄNÖSSÄ

Lyhy yhtheenveto Miljöpartiet de grönas (Miljööpuolue vihreitten) puolueprukrammista

**Tämä kirjotus oon lyhy yhtheenveto Miljöpartiet de grönas (Miljööpuolue vihreitten) puolueprukrammista. Ko puolueprukrammi kirjotethiin tuhanet ihmiset vaikutit siihen aatoksilla, polittisila ehotuksila, sanoila ja aatheen keskusteluila. Se sinänsä oon jo yks vihreän aatheen peruspultti. Politiikka – ja yhtheiskunta – oon jotaki semmosta, mitä met yhdessä luoma. Se oon meän yhtheinen vihreä ääni.**

**Sie saatat lukea puolueprukrammin kokonaisuessa täältä:  
[www.mp.se/partiprogram](http://www.mp.se/partiprogram)**

Miljöpartiet (Miljööpuolue) oon osa kokomailmalisesta liikheestä, jonka pyrkimys oon toivo mailmasta, jossa kaikki ihmiset saattava ellää hyvää elämää, huonontamatta tulevien polvien eelytyksiä. Meän politiikka rakentuu kokonaisnäkemyksheen: kaikki kuuluu yhtheen.

Ihmiskunta oon suurten uhmien eessä. Politiikka oon auvain muutokshiin ja se häätyy näyttää tietä kestävhään yhtheiskunthaan.

Miljöpartiet (Miljööpuolue) oon feministinen puolue. Moninaisuus, tasavertisuus ja tasa-arvo oon oikeuenmukasen yhtheiskunnan peruskiviä. Met olema vakuuttunheita siitä, ette ihmisten erilaisuus rikastuttaa mailmaa.

**Meän politiikka rakentuu kolhmeen sulitariteethiin:**

- Sulitariteetti elläinten, luonon ja ekolookisen systeemin kans
- Sulitariteetti tulevien polvien kans
- Sulitariteetti kaikitten mailman ihmisten kans

## **Ihminen**

Ihminen oon luova ja empaattinen olento, joka haluaa ja saattaa ottaa vasthuuta. Ihmisten aatokset sisältävvä fantastista moninaisuutta, joka vettää kehitystä etheen päin. Met uskoma temokratiihin, jossa oon aktiivisiä ja ossaaottavia kansalaisia. Se vaatii helposti saatavaa informasuunia, elävää polittista vuoropuhelua ja maholisuutta kansalaisile antaa omia ehotuksia polittishiin seurakunthiin.

Vihreä liike kannattaa vappaamielistä perspektiiviä poliitikassa. Uusia aatoksia kukkii, missä ihmisillä oon vaphautta mieltä ja tykätä oman pään jälkhiin ja missä aatoksia, visunia ja erilaisuutta kunnioitethaan. Kaikila häätyy olla samat oikeuet ja maholisuuet – huolimatta sukupuolesta, etnisiteetistä, uskonosta, toimintavajavuuesta, sukupuolitaipumuksista, sukupuoli-itenttiteetistä, sukupuolen ilmasusta ja ijästä.

Lapset oon myötä luomassa yhtheiskuntaa eikä vain passiivisiä sen yhtheiskunnan vasthaanottajia, jota raahvaat luova niile. Pitkäle tähtääminen oon yks miljööpolitiikan näkökanta, satsaus lasten pääle oon kans yks tulevaisuuen investeerinki.

Koulu häätyy antaa joka lapsele maholisuuen kehittyä. Ei sovi olla onnistunheita ja epäonnistunheita oppilhaita, ei hyviä eikä huonoja kouluja. Poliitiikka häätyy antaa eelytyksiä koulule, jossa oppilhaitten uteliaisuus ja opettajan pätevyys saava täyelisän merkityksen. Met uskoma kansansivistysheen ja elämänaikasheen oppimisheen. Ko kaikin saava maholisuuen valita oman elämäntien met saatama rakentaa lujan yhtheiskunnan yhessä.

Kaikile ihmisille häätyy antaa samat maholisuuat totteuttaa unelmansa. Kaikkea tiskrimineerinkiä häätyy vastustaa eikä kukhaan saa olla rasismän elikkä viharikosten kohtheena.

## **Miljö**

Vihreä aate ei vain kosketa ihmisten suhtheita toishiin vain kaikheen siihen mistä met olema riippuvaisia ja mitä oon meän ympärillä. Ihmisten vastuu ylittää oman persoonan ja oon ommaa sukupolvea pitempi. Elläimillä oon oikeus käyttäytyä luonolisesti eikä niihin saa kohistaa kärsimyksiä.

Elämäntapa rikhaassa osassa mailmaa saapi seurauksia näitten maitten ulkopuolelaksi. Met hääymä asettaa meän yhtheiskunnat muutokshiin niin, ette met klaaraama hyvän elämän elämisen tulevaisuussa samala tuhoamatta omia maholisuuksia, muitten maitten ihmisten maholisuuksia ja tulevien sukupolvien maholisuuksia.

Klimattimuutokset vaarantavva meän tulevaisuutta. Net vaikuttavva yksityisten ihmisten elämähän, kokomailmalisheen ekonomiihin ja kokonaishiin kansojen olemassaolhoin. Huolimatta meän tieosta tästä kaikesta kasvohuonekaasujen päästö vain jatkuu. Met tarttema olla johtavia ihmisen klimattivaikutuksen vähentämisessä. Ruotti oon histuurialisesti aiheuttannu, ja aiheuttaa vieläki, paljon enämpi päästöjä ko mikä oon kokomailmalisesti kestävä. Ruottila oon aivan ynikit eelytykset johtaa kestävä yhtheiskunnan siirtoa muutokshiin ja siinä samassa osottaa toisenlaisen kehityksen maholisuuutta. Tämä vaatii urhoolista miljööpolitiikkaa. Met Miljööpuoluessa (i Miljöpartiet) olema vakuuttunheita siitä, ette miljööviisas yhtheiskunta oon kans yhtheiskunta, joka oon ihmisille parempi.

## **Ekonomii**

Mailma tarttee uuen ekonoomisen politiikan. Jatkuva ekonoominen kasvu perinteelisessä merkityksessä ei ole maholista planetalla, jossa resyrsit oon rajaliset. Tässä oon kysymys joistaki ittesthään selvistä prinssiipistä:

- Mikä oon ihmisille ja miljööle hyvä tarttee olla halpaa.
- Mikä oon huonoa ihmisille ja miljööle tarttee olla tyyristä.
- Mikä oon liika vahinkolista, sen tarttee kieltää.

Ihmisen kekseliäisyys oon maholistanu viimisten satojen vuosien kierän ekonoomisen kehityksen. Kehitys oon monela laila olli myöntheinen mutta samala resyrsien käyttö ja kasvuhuonekaasujen päästö oon lissäintynny. Piulookinen moninaisuus oon

vähentynny. Uusila priuriteerinkilä ja uuela tavala mitata hyvinvoinin met saatama rakentaa ekonomiin, joka ei ole riippuvainen jatkuvasta kasvusta.

Met olema vakkuutettuja siittä, ette kestävä yhtheiskunta vaatii urhoolisuutta tehdä polittisia päätöksiä. Silloinki ko päätöksiä enkkeltisti ei saata räknätä voitoksi perintheelisenä kasvuna.

Halvan enersiin paljous hiilenä ja öljynä oon aiheuttannu isoja kasvuhuonekaasujen päästöä. Muutosten siirtäminen pitkäle tähtäävälle kestävälle ekonomiile oon suurelta kysymys enersiisysteemien muutoksista. Met hääymä käyttää enersiitä enämpi tehokkaasti ja uusiutuvan enersiin ossuus häätyy olla sataprosenttinen.

Met halvama nähä yhtheiskunnan, joka oon vappaa yinvoimasta. Yinvoima tietää liika isoja riskiä ja jättää raatiuaktiivista roskaa tuleville polvile.

Jos met emmä nyt aseta enersiisysteemin muutosta, järjestetyllä mallila, resyrsien puute tullee pakothaan muutoksen sittemin. Silloin se tapahtuu korkeamphaan hinthaan yksityisele kansalaisele, yrityksele ja koko kansakunnile.

### **Hyvinvointi**

Hyvinvointi häätyy antaa ihmiselle vaphautta, elämänlaatua ja turvalisuutta. Met olema voimakhaimpia ko met tiämä, ette met kannama toinen toisesta huolta ko met olema hauhraimpia. Siksi yhtheiskunta häätyy kattoo perhään, ette yhtheiskunta tarjoaa hoitoa ja huoltoa ko met tarttema niitä. Yhtheiskunta häätyy kans kattoo perhään, ette oon turvasysteemiä sille, joka oon sairas elikkä ilman työtä. Se oon kohtuulista, ette net, jotka pärjäävä hyvin tuova enämpi kaikkien yhtheisheen.

Ruottin hoito ja sairashuolto häätyy olla tasa-arvonen ja uuenaikanen. Eistääkseen hyvää terhveyttä oon yhtä tärkeätä satsata kansanterhveytheen ko satsata sairashoithoon.

Met halvama antaa alueile ja kunnile enämpi valtaa polittishiin päätökshiin, jotka koskeva näitä. Huolimatta siittä missä päin maata sie asut sie tarttet tärkeitten yhtheiskuntafynksuunien saanin, kuten polisi, posti ja fasta telefoni. Ruotti tarttee rustata miljoonaprukrammin. Ei saa olla perukoita Ruottissa, jossa asujat kokeva, ette het häätyvä siirtyä saa'aksheen maholisuuksia.

Meilä oon visuni, ette kaikin joila ei ole tuloa saava karanteeratun taun, jolla saattaa elättää itten, huolimatta eeltävistä tuloista ja huolimatta siittä miksi tuloja ei ole. Met halvama nähä yhistetyn vakkuutuksen, jota virasto hoitaa. Met prukaama sanoa, ette tarttee olla "ovi sisäle" välttääksemme, ette joku yksityinen lankeaa toolien välistä.

Hyvinvointitoimintaa ei saa hantteerata niinku mitä markkinaa vain. Met emmä ole konsymänttiä meän suhtheessa hyvinvointhiin, met olema kansalaisia. Verorahotus tarttee mennä tarkotethuun toiminthaan, sitä ei saa ottaa voittona.

## **Mailma**

Monet mailman ihmiset on nousemassa köyhyestä. Hyvinvointi leviää, keski-ikä lissäintyy ja lapsikuohleisuus vähenee. Samala ihmiskunta kohtaa uusia uhmia kuten luononresyrsien liikkäyttö ja miljöouhat. Vihreän liikkeen tehtävä on löytää uusia teitä niin, ette useamat ihmiset saattava saa'a ossaa hyvinvoinista, samala ko met otama vasthaan klimatti- ja miljöouhat.

Miljöpartiet de gröna (Miljööpuolue vihreät) on lämpimiä kansainvälisen ytheistyön kannattajia. Samala met halvama, ette valtaa käyttää se, jota se koskee. Tämän vakamuksen seuraus on se, ette met olema eppäilevällä kannala siihen ette keskusta johtaa, samoten päätökshiin, jotka siirtävä vallan kauemas ihmisistä.

Miljöpartiet (Miljööpuolue) on EY-kriittinen puolue. Met halvama EY:n kehittyvän enämpi liikkuvhaan ytheistyöhön, joka salli jokhaiselle jäsenmaale maholisuuen valita missä osissa net halvava olla myötä, tietysti kohthuun rajojen sisälä. Ruotti tarttee olla vappaa EMU:stä.

Ruottin rauhantyön ja avun ossuus ei ole uskottava niin kauon ko met samala eksportteeraama asheita tiktatyhriin ja köyhhiin maihin. Oikeuenmukanen ja kestävä kokomailmalinen kehitys häättyy asettua lyhyjen ekonomisten intressien etheen.

Miljöpartietillä (Miljööpuolueela) on visuni rajattomasta mailmasta, jossa kaikki ihmiset saattava siirtyä, mutta jossa kukhaan ei tartte paeta. Met emmä usko maitten oikeutheen valita asukhaita, met uskoma ihmisten oikeutheen valita, missä net halvava asua. Ihmisiä häättyy kohata maholisuuksila eikä muurila. Met olema ylpeitä siitä, ette met olema se puolue, joka on kaikkiin avoin siirtoliikheele.

## **Polunvaeltaja**

Samala ko Miljöpartiet (Miljööpuolue) on polittinen puolue se on kans polunvaeltaja. Met olema niin meän aikakautta eessä ko sen keskelä. Met emmä saa menettää yhtheyttä niihin, jotka tuleva meän perässä samala ko meilä ei ole hukattavaa aikaa. Met tohima olla askelheen eessä.

Huoltavat ja osalistuvat ihmiset muuttava mailmaa. Jokanen kehitys alkaa yksityisen ihmisen vakamuksesta ja osalistumisesta. Sillä on väliä ko tehet!

Tämä kirjoitus on lyhy yhtheenveto Miljöpartiet de grönas (Miljööpuolue vihreitten) puolueprukrammista. Tässä sie saatat lukea meän visunista ja siitä aatheesta, joka on meän polittisten ehotusten pohjaa. Jos sie tulet utelihaaksi ja halvat tietää enämpi meän politiikasta sie saatat lukea lissää [www.mp.se](http://www.mp.se). Sieltä sie kans löytät puolueprukrammin kokonaisuuehaan.